

四庫全書

子部

欽定四庫全書

羣書考索續集卷二十七

宋 章如愚 編

禮樂門

樂

序禮序始自郊廟而後及乎朝廷鄉黨惟樂亦然蓋樂者樂也神祇祖考安樂之則人和可知矣然樂自天作樂由陽來至和之發也其治心也德成而後知樂其治

人也功成而後作樂至和之極也其粗易知其妙難知
姑述所知以為樂志之釋

成周郊廟樂律周官大司樂奏黃鍾歌大呂以祀天神

奏太簇歌應鍾以祀地祇奏姑洗歌南呂以祀四望奏

蕤賓歌函鍾

林鍾也

以祭山川奏夷則歌小呂

中呂也

以享

先妣奏無射歌夾鍾以享先祖云者黃鍾子大呂丑太

簇寅應鍾亥也日月會於子則斗建丑日月會於丑則

斗建子日月會於寅則斗建亥日月會於亥則斗建寅

也即術家所謂子與丑合寅與亥合也其餘可以類推

即太師所謂六律六同合陰陽之聲也

陽聲黃鍾太簇姑洗蕤賓夷則

無射陰聲大呂應鍾南呂林鍾中呂夾鍾

古者下奏黃鍾之律登歌大呂之

章所謂聲依永律和聲也聲律合於陰陽之和故能動

天地感鬼神也後世祭祀下奏登歌俱是陽律故趙謹

言以為不應古法誠有以也雖然此特論律呂之相合

者耳必求其變則不可以槩言大司樂又曰冬至之日

祀天圜丘以夾鍾為宮

夾鍾房星卯位為天帝明堂故為天之宮

黃鍾為角

太簇為徵姑洗為羽六變而天神降者此言律之相次者也天尚道故取其道之自然也又曰夏至之日祀地

方丘以林鍾為宮

林鍾井鬼未坤位故為地之宮

太簇為角姑洗為徵

南呂為羽八變而地示出者此言律呂之相生者也

八隔

生相地尚功故取其功之所生也又曰祀宗廟以黃鍾為

宮

黃鍾虛危之位為宗廟故為人之宮

大呂為角太簇為徵應鍾為羽九

變而人鬼可得而禮者此言律呂之相合也人尚情故取諸相合情之所感也止知樂律之相合而不知樂律

之相次相生則不足以知樂之變通矣

尚道尚功尚情之說按禮書又

王氏陰陽心經所言與此暗合

歷代樂律秦廢先代之樂故漢初制氏樂有司止能紀鏗鏘鼓舞而不能紀其義東漢雲翹育命之舞後人莫知其所自出則知後世郊廟所奏樂律所謂相合相次相生其義安在唐舊志載唐初祖孝孫所制推樂祭圜丘以黃鍾為宮奏豫和之樂方澤以林鍾為宮奏順和之樂宗廟以太簇為宮奏雍和之樂已與大司樂正宮

旋宮之文多所異同而神祇宗廟登歌俱奏肅和之樂
所謂相合相生皆不言其義於是張文收盡遵大司樂
舊制正宮旋宮下奏登歌無不同者其所不同惟不用
雲咸韶夏濩武之舞而自用唐家十二和之曲而已迨
宋朝易和為安祭天以高安祭地以靜安宗廟以理安
天地宗廟登歌同用嘉安安與和雖異名而同實者樂
章皆一代之所自制有所不必辨也其所不可不辨者
鍾律也國初所用之樂乃後周王朴之所制也黃帝調

十二律而為十二均者蓋取旋相為宮之義王朴調十一律而為十二均者以悉主黃鍾之宮黃帝用宮王朴虛宮猶用中虛中也十二均八十四調則五聲並行其間

每一均七調十二均八十四調也

十一均八十一調則四聲並足其

數

徵商羽角

大抵朴之論律以黃鍾為主故言十一聲以宮

為主故止言四也

見通鑑

真宗初年太常言郊廟止用黃

鍾一調未嘗隨月轉律也樂工單仲辛遂改為八十四調是仲辛之制與黃帝合矣果孰是孰非耶愚試為

之辨

漢樂不古漢承秦弊雅樂論亡制氏所掌自鏗鏘之外
無他事其後河間獻王號通樂律推而上之僅備歲時
荊州杜夔善知八音攷而正之徒設鍾簾而李延年之
叶律乃無異也

宋朝樂律樂聲高則聲清近於哀思下則聲濁近於緩
散和峴以王朴之樂為聲高遂下一律人尤以為高謂
其黃鍾乃古夾鍾信如或者之言則大司樂奏夾鍾為

宮以祀天朴豈與此暗合歟仁宗皇祐中詔定新樂是
單仲辛之調必有不合者矣於是李照又下王朴之律
失之太濁歌工賂鑄工密減銅劑而聲稍清歌乃叶照
初不之知照亦不足謂之知音矣又王朴編鍾皆不圜
而側垂李照改鑄圜其形而下垂叩之拚鬱不揚其鑄
鍾長甬震掉不和劉義叟以為與周景無射之鍾無異
未幾仁宗以疾其樂遂廢不用先是鑄寓務得古編鍾
一其形不圜而側垂與王朴夷則清聲合乃知朴之所

知者樂音也故不局於器照之所知者樂器也故不達

於音何以知其然耶劉幾定元豐新樂以律生尺也魏

漢律定政和新樂以指生尺也

蔡京薦漢律定律以上中指而為寸生尺取大

禹身為度之義

皆局於器而昧於音者故李照胡安定以尺生

律

照累黍之從失之長安定累黍之衡失之短

和峴以表定尺阮逸以量求

音皆非也人皆謂房庶以律生尺而黍用一桴二米者

僅得之曾不知庶之言按西漢律歷志一黍之下脫之

起積千二百黍八字故理不通庶乃以黃鍾律長九寸

其中容千二百黍九寸加一寸以為尺

西漢律歷志乃劉歆三統歷杜

收嘗非之矣

故司馬君實以尺生律本之胡安定范蜀公以

律生尺本之房庶亦未免局於器而已處士徐復有言曰古人寓器以聲不求其聲而更其器不可用也意者王朴之樂有得於聲而他皆未之或知也

宋朝樂律之議○仁宗廟范公鎮嘗論古樂以為聲音生於無形故後世必假有形之物以傳其法於是有十不同之辨

神廟朝劉公幾嘗論樂以為聖人作以紀中和之聲所以導中和之氣清不可太高重不可太下○宋朝太常樂之律凡三等王朴之樂一也李照之樂二也阮逸之樂三也而議者以為王朴阮逸之黃鍾與李照樂之太簇相當王朴阮逸之樂編鍾編磬各十六雖有四清聲而實差黃鍾大呂之正聲也李照之樂編鍾編磬各十二雖有黃鍾大呂而全缺四清聲非古制也○昔范蜀公司馬文正公議樂律往復數千言卒莫能定而異時

崇寧中作大晟樂蜀公故吏以公舊所改制之說來上
復以古人以身為度之法而大樂以定不愧韶勺孰謂
是學吏猶能之乎

歷代郊廟樂章虞書曰詩言志歌永言又曰拊搏琴瑟
以詠此即詠歌章之詩於堂上所謂貴人聲也樂本倣
人非人倣樂故凡六律八音以歌為本想當時賡歌與
九叙惟歌良哉惰哉戒之董之皆有勸戒之意被之樂
章協于音律于以和神人格祖考皆可也周官大司樂

所謂歌大呂以祀天神歌應鍾以祀地示歌夾鍾以享
先祖者即思文清廟執競諸詩協以鍾律之調被之絃
歌之聲所謂一唱三嘆有遺音也漢初宗廟奏嘉至永
至比古者采齊肆夏之詩乾豆登歌比古者清廟之歌
乃叔孫氏因秦樂人以制之耳高祖有房中之歌七章
乃唐山夫人述楚聲也武帝郊祀十九章之歌備述功
德格于幽顯乃集秦楚之歌謳相如之詩賦畧論律呂
以合八音而已安得虞周之歌頌勸戒之實意哉自漢

而下諸史所志歷代郊廟與日月星辰社稷諸祀樂章
皆當時臣下創為大名多為好詞溢美功德不足多論
亦不必多辨也

郊廟鼓鼗箎絃大司樂雷鼓雷鼗以祀天神靈鼓靈鼗
以祀地示路鼓路鼗以祀人鬼鄭氏注雷鼓雷鼗八面靈鼓
靈鼗六面路鼓路鼗四面唐開元中蜀人有繪圖以獻
者一鼓遂為八面者既不可考擊乃於縣間別置散鼓
宋朝乾德四年詔廢不用今太常於郊廟之祭所用之

鼓可知矣澠水燕談曰神有尊卑則數有多寡幾面鼓
猶言幾兩車幾區宅耳愚按唐書史思明以腰鼓三百
面遙脅之豈一鼓而三百面耶二鄭釋經既已模稜後
人承訛一至此極雖禮樂之節目亦未易言矣況大本
乎是故管有孤竹孫竹陰竹之異琴瑟有雲和空桑龍
門之辨者即黃帝堯舜氏雲咸大韶所奏之八音各隨
樂舞以祀天神人鬼而已苟復如雷鼓強為之說則又
失之矣

大祭小祀皆用樂天地四方五帝日月星辰斗極宗廟
社稷先農先師山川羣望百神之祀其牲幣器數樂章
樂舞皆有等級諸志各列一代之升降因革自有司存
不必序辨而其所以皆用樂者何也按仁宗嘉祐中禮
官議曰傳稱祭天以煙為歆降之始以血為陳饌之始
祭地以埋為歆神之始以血為陳饌之始祭廟以灌為
歆神之始以腥為陳饌之始然則天地宗廟皆以樂為
歆神之始者合夫祭有三始之義也天地之間虛豁而

不見其形者陽也鬼神居天地之間不可以人道接也
樂由陽來聲屬於陽故以樂之聲音號發於天地之間
庶幾神明聞之因而來格也商人之祭先求諸陽蓋謂
此也周人尚臭四時之祭灌地以求神求諸陰之義也
然則天地神祇人鬼之祀不可去樂明矣所言當理何
李昭輩所更樂器未達此理耶特存之以為祭祀用樂
說

封禪獨不用樂大祭小祀皆用樂惟封禪非常之祀獨

不用樂者何也漢武親郊泰畤采詩夜誦昏祠至明異
乎南北郊之正祠矣其登封泰山凡再至焉自有祕祠
其巔而無用樂之文光武登封先令石工刻所為記於
山上而乃燎祭於山之下羣神皆從用樂如南郊事畢
登封璽印玉牒發石泥封乃下唐高祖登封之禮與光
武同是山之下用樂而山之上不用樂也至宋朝真宗
將封泰山有司按故事山上止登歌封安禪安之章山
下則設宮縣二舞其山巔闋臺亞獻終獻例不用樂夫

登封祭天告厥成功猶南郊祭天以歲歲事樂舞均可用也歷代何為而不同蓋秦漢封禪所以祈長年希神仙所祈之言祕不可宣與南郊之意異趣則樂舞安所用之觀郊祀志言武帝自有祕祠其巔可以意見矣

樂成感格虞周作樂九成九變祖考格神示降鳳凰儀百獸舞羽毛鱗介之物山林川澤之示皆可致幽而鬼神微而鳥獸隨感而應而況於人乎何漢唐以來不聞有是也蓋古者樂律合陰陽之聲樂舞紀功德之實采

詩觀民風因而被之樂章

伶州鳩曰天子省風作樂罷以鍾之大孔子刪詩皆被之

管絃

又以見安樂怨怒哀思之情故治亂之音足以動天

地感鬼神致諸福之物也自漢人樂律莫能言其義而樂舞又莫知其所自出凡大風天馬之歌被之樂章自文功德又非出於斯民之至情風俗之真機其何能有所感格哉雖然天降時雨山川出雲嗜慾將至有開必先民之至情樂之真機有不可泯者如唐武氏未興天下歌嫵媚娘韋氏未起天下歌桑條韋稭耄之謠其思

無邪治亂之音哀樂之所由兆宜於是而占之

殿庭通用文武二舞唐樂十二和

周曰十二順

故宋朝更為

十二安

取治世之音安以樂之義凡郊廟社稷星辰總以安為名

唐初有九功七德

之舞故宋朝郊廟殿庭通用文德武功之舞乾德四年

和峴言國家以揖遜得天下次以征伐請改殿庭所用

文舞為元德升聞之舞武舞為天下大定之舞遂改唐

太宗舞圖用一百二十八人為八佾

分為八行每行十六人

履服袴褶執笏引舞者二人各執五采纛武舞皆金甲執戟引舞者執五采旗象

太祖平諸國

仁宗英宗朝二舞止用六十四人太宗淳化二年和嶠請改元德升聞為天下化成改天下大定為威加海內

象太宗平諸國

並與文德武功之舞郊廟通用其大畧皆因唐

制也唐貞觀中張文收取漢朱鴈天馬之遺為景雲河清之歌以為燕樂而宋朝和峴亦請謨神龜甘露紫芝嘉禾玉兔五瑞各為一曲每朝會登歌以之為首亦漢唐舊制也然則宋朝之樂舞樂章皆因漢唐之舊乎曰非也漢唐元會之侈惟獨宋朝不然已嘗備論之矣昔

太祖及太宗初受朝賀猶用教坊樂未幾而更以雅樂
登歌二舞自是為定制至太宗增琴為九絃取君臣文
武禮樂正民心之意增阮為五絃取金木水火土五材
並用之義且謂鄭聲非中和之道而雅正之音可以治
心而真宗不喜鄭聲或為新詞新聲者未嘗宣布于外
故其仁宗及英宗二舞復古八佾之制累聖相承者如
此異乎唐太宗悲悅不由乎樂之言矣惜乎景祐元豐
政和所用新樂非祖宗之舊耳

朝會用雅樂宋朝臨軒之樂為隆安飲食為和安尊號

冊寶為正安正冬朝賀為求安此樂章之名也乃竇儼

陶穀

太祖朝

蘇易簡

太宗朝

晁迥楊億等

真宗朝

撰述其樂舞

之名則和峴

太祖朝

和嶸

太宗朝

之所更定自太祖元會用

雅樂設宮縣冬至登歌二舞羣臣禮飲

或五行七行太官賜食

太

宗及真宗遂為定式蓋樂章之所歌詠樂舞之所形容

乃削平僭偽一統之意所謂太常雅樂也大朝會大祭

祀則用之其歲時燕享則用教坊樂嘗觀唐初朝會必

奏秦王破陣樂示以武功定天下也開元天寶升羌部

於堂上即羯鼓噍殺之音涼州甘州伊州之曲也

以羯鼓

擊之其聲
透空最遠

未幾祿山反涼州甘伊二州皆陷孰謂聲音

不足為治亂之兆乎宋朝靖康之變未作人間習為番
笛番鼓番舞使當時常如祖宗朝不忘本始以表風俗
安得有是不虞之變哉

燕樂周有嘉魚鹿鳴諸詩所以燕嘉賓漢有黃門鼓吹
所以樂羣臣至宋朝燕樂羣臣嘉賓多用教坊樂開寶

中平嶺南得內臣之聰警者俾於教坊習樂

嶺南多宮官號

曰簫韶部雍熙中改曰雲韶部每宮中內宴則用之其

大曲十三皆太宗之所親製萬年歡中樂普天獻壽等

是也至于仁宗時內傳雲韶部遂不復補以其無與於

羣臣嘉賓歟然於太宗淳化三年命兩制分撰鄉飲樂

章凡三十四章有鹿鳴

八章二章二

南陔

二章二

嘉魚

八章

二四句

崇丘

二章二章二

關雎

七章二章二

鵲巢

六章二章二

諸詩立名

命意與古詩同而措詞演句多倍於古其情親其詞腆

誠有補於風化考之三朝國史九朝帝紀淳化中雖講明此理而實未嘗行至于真宗朝亦然豈是理終不可

施於今歟

宋朝射享之禮雖常行而其樂章亦是常所用者今不復論辨

清樂唐會要論清樂乃九代遺音其始即清商三調是也漢氏以來舊曲自晉播遷其音分散符氏滅涼得之傳于二秦宋武入關收入江南及隋平陳文帝聽之曰華夏正聲也乃置之清商部總謂之清樂至煬帝乃立清樂西涼等為九部如白雪白紵庭花春江月夜等是

也蓋自周隋以來多用西涼龜茲樂其曲調世俗所知也果可謂之九代遺音乎庭花夜月亡國之音豈華夏正聲一變而為此乎舊唐志云清樂至唐武后時猶存六十三曲春江花月夜玉樹後庭花陳後主所作也堂堂汎龍舟隋煬帝所作也白雪周曲遺聲也公莫巾舞象項伯以衣袖蔽劍也已渝象漢高帝以巴渝人擁盾伐楚也昭君王嬙入匈奴也白紵吳地所出吳舞吳歌也子夜團扇懊懷春草烏夜啼石城莫愁採桑皆晉宋

齊梁歌舞所傳於後者故隋文謂之九代遺音耳按舊唐志所載如此則知雅聲少鄭聲多自子夜團扇而下皆淫聲悲思之曲謂之九代遺音則可謂之華夏正聲未可也

軍樂大司樂王帥大獻則令奏愷樂樂師教愷歌遂倡之罽師鼓愷樂凡軍之夜三鑿皆鼓之所謂軍樂也晉文公敗楚于城濮振旅愷以入于晉唐太宗平羣盜被金甲奏愷獻捷皆愷歌也至宋初有鈞容直

取鈞天
之義籍

軍中之善樂者巡省遊幸則導車駕而奏樂又有東西
班夜奏樂於行宮祠祀駕回及園苑賜宴館遇使人分
用諸軍樂諸州亦有衙前樂營皆所謂軍樂也然周禮
太師掌執同律以聽軍聲又非止於軍樂矣武王伐紂
吹律聽聲而知必勝者孟春王於季冬殺氣相并而音
尚宮同聲相應也太史公律書曰六律為萬事根本其
於兵械尤重望敵而知吉凶聞聲而效勝負古今知音
必有妙於此者非徒歌舞之謂也

樂曲調古樂有三調清調平調側調也

唐舊志側調謂之瑟調漢三調

即周房中遺音白雪調也

隋鄭譯八十四調又有新聲犯聲側聲正

殺寄殺偏字傍字雙字半字之法非古樂調也又五音

宮商角為從聲者律從律呂從呂也徵羽為變聲以律

從呂呂從律也故從聲以配君臣民變聲以配事物六

為君聲則商角皆以律應徵羽皆以呂應六呂為君則商角皆以呂應徵羽皆以律應也隋志載鄭

譯七調之說曰周有七音之律

五音與變宮變徵也

漢志有七始

之義黃鍾為天始林鍾為地始太簇為人始姑洗為春

蕤賓為夏南呂為秋應鍾為冬是也此以黃鍾為正而
隔八以相生也故黃鍾為十三律之本而七始得七音
之正鄭譯之言可謂正矣何為從聲變聲無復條理而
萬寶常預知其為亡國之音乎想新聲犯聲偏字旁字
不勝煩碎而近乎哀思如庭花月夜等曲也或曰唐人
所為曲哀樂尚相諧會今人哀思而歌樂調樂聲而歌
怨詞語雖切而不能感動人心由聲與意不相諧也豈
信然乎愚謂少陵淵明無詩不及酒可也今人無曲不

及色乃見風俗之薄

五音伶倫取嶰竹斷兩節間長三寸九分而吹之以為黃鍾之宮謂之含少次制十二簫寫鳳之鳴辨雌雄而為律呂夫十二律皆不盈尺黃鍾含少近三寸餘伶倫吹以寫鳳典同吹以辨陰陽太史公所謂聞聲而知勝負班志所謂氣合而生風者何由也詩曰鳳凰鳴矣于彼高岡荀卿曰有鳳有凰其聲若簫蓋鳳有中和之氣高潔之情吹律以寫鳳鳴則律呂之調自應宮商之音

自和古人以氣聽以聲聽聲氣俱和故可合天地之風
氣而辨陰陽知勝負也淮南子曰黃鍾之律九寸而宮
音調晉志云黃帝作律以玉為管長尺而六孔以為十
二月音是樂律長不過尺也晉荀勗梁武帝制黃鍾之
笛或長二尺八寸餘或長三尺八寸凡十二笛短者不
減二尺餘何哉京房曰截管為律吹以考聲其聲微而
體難知故作準以代之荀勗梁武之笛亦京房作準之
意耳以此知古人妙於聽聲故黃鍾含少不四寸而可

知後世局於形器黃鍾之笛數尺十二鍾之制如是之大猶不能辨其為宮為商為角也晉志之言曰古者調律出於耳聽後世據尺度而為之適足易差觀斯言則知後世鍾律器數之辨不足多較是非惟妙於知音斯可耳

樂章生於人心韓琦論樂音之起生於人心是以喜怒哀樂之情感於物則唯殺嗶緩之聲隨而應之非器之然也祖宗以來通用王朴之樂未嘗更易以至天下無

事垂八十載而樂之用非不和項因燕肅之女加磨鑢
李照再加改作洎阮逸胡瑗繼至盛言照樂穿鑿再令
造律則又圍徑乖古鄧保信續作新法亦復長廣未合
臣竊計之不若窮作樂之源為致治之本使政令平簡
民純熙洽海內擊壤鼓腹以歌太平斯乃治古之樂可
得以罷象求之乎

樂律

聲音律笛鍾均五聲八音十二律十二笛十二鍾十二

均之制與夫京房律準梁武帝四通荀勗錢樂之法其
詳已見律志諸說此不復著大抵樂以人聲為本聲以
能聽為主而已人有所不必辨者如所謂霓裳羽衣曲
觀其名則知其為靡慢之音矣新唐志云開元中河西
節度楊敬忠獻此曲長恨歌以為因楊妃之舞而為此
曲王建詩云聽風聽水作霓裳乃龜茲國王聽風水之
聲而作之故河西得之以獻所謂涼州甘州伊州皆其
類也

定律始於尺定尺始於黍若世無夔牙則當以法自據
雖有清濁高下其失不遠顧以胡瑗八百一十方分之
法取上黨秬黍之中為據○昔秦始中嘗命定律荀勗
以為後世之尺長於古者四分有餘及得古尺驗之果
然夫尺之長短繫黍而為之也黍之小大失其宜則尺
之長短失其度矣尺之長短失其度則樂之高下失其
聲矣此反本窮源之論也

樂律定於近世之儒

近世鍾律之議愈舛蔡氏獨究其
本原為之說所以有得於古人之

意○古樂之亡久矣然秦漢之間去周末遠其器與聲
猶有存者故其道雖不行於當世而其為法猶未容有
異論也逮于東漢之末以接西晉之初則已浸多說矣
歷魏周齊隋唐五季論者愈多而法愈不定爰及宋朝
功成治定理宜有作建隆皇祐元豐之間蓋亦三致意
焉而和胡阮李范馬劉楊諸賢之議終不能以相一也
而況於崇宣之季奸諛之會黥涅之餘而能有以語夫
天地之和哉丁未南狩今六十年神人之憤猶有未撫

是故不遑於稽古禮文之事然學士大夫因仍簡陋遂
無復以鍾律為意者則已甚矣吾友建陽蔡君元定李
通當此之時乃獨心好其說而力求之旁搜遠取巨細
不捐積之累年乃若冥契著書兩卷凡若干言予嘗得
而讀之愛其明白而淵深縝密而通暢不為牽合傳會
之談而橫斜曲直如珠之不出於盤其言雖多出於近
世之所未講而實無一字不本於古人已試之成法蓋
若黃鍾圍徑之數則漢斛之積分可考寸以九分為法

則淮南太史小司馬之說可推五聲二變之數變律半聲之例則杜氏之通典具焉變宮變徵之不得為調則孔氏之禮疏因亦可見至於先求聲氣之元而因律以生尺則尤所謂卓然者而亦班班雜見於兩漢之志蔡邕之說與夫國朝會要以及程子張子之言顧讀者不深考其間雖或有得於此者而又不能無失於彼是以晦蝕紛拏無復定論大抵不拘攣於習熟見聞之近即肆其冒臆妄為穿穴而無所据依李通乃能奮其獨見

超然遠覽爬梳剔抉參互考尋用其半生之力以至於
一旦豁然而融會貫通焉斯亦可謂勤矣及其著論則
又能推原本根比次條理管括機要闡究精微不為浮
詞濫說以汨亂於其間亦庶幾乎得書之體者予謂國
家行且平定中原以開中天之運必將審音叶律以諧
神人當此之時受詔典領之臣能得此書而奏之則東
京郊廟之樂將不待公孫述之瞽師而後備而參摹四
分之書亦無待乎後世之子雲而後知好之矣

西山蔡氏律歷

新書

序

聲律

黃鍾之宮為五聲之中統乎五聲者也

○五聲之序宮最大而沉濁

羽最細而輕清商之大次宮徵之細次羽而角居四者之中焉然世之論中聲者不以角而以宮何也曰凡聲陽也自下而上未及其半則屬於陰而未暢故不可用上而及半然後屬於陽而始和故即其始而用之以為宮因其每變而益上則為商為角為變徵為徵為羽為變宮而皆以為宮之用焉是以宮之一聲在五行為土

在五常為信在五事為思蓋以其正當衆聲和與未和
用與未用陰陽際會之中所以為盛若角則雖當五聲
之中而非衆聲之會且以七均論之又有變徵以居焉
亦非五聲之所取正也然自其聲之始和者推而上之
亦至於變宮而止耳自是以上則又過乎輕清而不可
以為宮於是就其兩間而細分之則其別又十有二以
其最大而沉濁者為黃鍾以其極細而輕清者為應鍾
及其旋相為宮而上下相生以盡五聲二變之用則宮

聲常不越乎十二之中而四聲者或時出於其外以取諸律半聲之管然後七均備而一調成也黃鍾之與餘律其所以為貴賤者亦然若諸半聲以上則又過乎輕清之甚而不可以為樂矣蓋黃鍾之宮始之始中之中也十律之宮始之次而中少過也應鍾之宮始之終而中已盡也諸律半聲過乎輕清始之外而中之上也半聲之外過乎輕清之甚則又外之外上之上而不可為樂者也由是論之則審音之難不在於聲而在於律不

在於宮而在於黃鍾蓋不以十二律節之則無以著乎
五聲之實不得黃鍾之正則十一律者又無所受以為
本律之宮也今有極論宮聲之妙而無曰黃鍾云者則
恐其於聲音法制之間猶有所未盡也夫以聲音法制
之粗而猶有未盡則雖有黃帝大舜之君伶倫后夔之
佐亦如之何徒手而可以議大樂之和哉又有為宮當
配仁之說者恐亦非是迹其所以蓋以仁當四德之元
而有包四者之義耳夫仁木行而角聲者也以之配宮

則仁既不安而信亦失據然以為可包四者則不害其有是理也夫五行之序水為之始水為之終而土為之中以河圖洛書之數言之則水一木三而土五皆陽之生數而不可易者也故得以更迭為主而為五行之綱以德言之則木為發生之性水為貞靜之體而土又包育之母也故木之包五行也以其流通貫澈而無不在也木之色五行也以其歸根反本而藏於此也若夫土則水火之所寄金木之所資居中而應四方一體而載

萬類者也故孔子贊乾之四德而以貞元舉其終始孟子論人之四端而不敢以信者列序於其間蓋以為無適而非此也是則宮之統五聲仁之包五常蓋有並行而不悖者矣何必奪彼以予此然後快於其心哉

文公文集

律呂

推十二律旋相為宮及十二律上生下生與夫變宮變徵之說

凡十二律各以本

律為宮而生四律如黃鍾為宮則太簇為商姑洗為羽林鍾為徵南呂為角是黃鍾一均之聲也若林鍾為宮則南呂為商應鍾為角太簇為徵姑洗為羽是林鍾一

均之聲也各就其宮以起四聲而後六十律之聲備非以黃鍾定為宮太簇定為商姑洗定為羽林鍾定為徵南呂定為角也但黃鍾大呂太簇夾鍾姑洗中呂蕤賓林鍾夷則南呂無射應鍾為十二律長短之次宮商角徵羽為五聲長短之次黃鍾一均上生下生長短皆順故得各用其全律之正聲十二律名今俗樂亦用之合字即是黃鍾但其律差高耳筆談言之甚詳自林鍾之宮而生太簇之徵則林鍾六寸而太簇八寸徵反長於

宮而聲失其序矣故以十二律而言雖當為林鍾上生太簇而以五聲而言則當為宮下生徵而得太簇半律四寸之管其聲方順又自太簇半律四寸之管而生南呂五寸有奇之商則於律雖本為下生而於聲反為上生矣自南呂五寸有奇之商而生姑洗七寸有奇之羽則於律雖本為上生而於聲則又當用其半而為下生矣自姑洗半律三寸有奇之羽而生應鍾四寸有奇之角則於律雖為下生而於聲反為上生矣其餘十律皆

然然孔疏蓋知此法但言之不詳耳

半律杜佑通典謂之子聲者是也

此是古法但後人失之而唯存黃鍾大呂太簇夾鍾四律有四清聲即此半聲是也變宮變徵始見於國語注中及後漢樂志乃十二律之本聲自宮而下六變七變而得之者非清聲也如黃鍾為宮則第六變得應鍾為變宮第七變得蕤賓為變徵如林鍾為宮則第六變得蕤賓為變宮第七變得大呂為變徵也凡十二律皆有二變一律之內通前五聲合為七均祖孝孫王朴之樂

皆同所以有八十四調者蓋每律各添此二聲而得之也蔡氏新書此說甚詳候氣之說其中亦已論之蓋埋管雖相近而其管之長短入地深淺有不同故氣之應有先後耳非以方位為先後也但畫一圖朝夕看誦仍於指掌間輪之久久自熟乃見其妙此又可驗凡事皆然別無奇巧只常久而習熟便是妙處也

文公文集

金聲玉振

奏之以金所以極其變節之以玉所以成其章

○金聲或洪或殺清

濁萬殊玉振清越和平首尾如一故樂之作也八音克

諧雖若無所先後然奏之以金節之以玉其序亦有不
可紊者蓋其奏之也所以極其變也其節之也所以成
其章也變者雖殊而所以成者未嘗不一成者雖一而
所歷之變洪纖清濁亦無所不具於至一之中聖人之
知精粗小大無所不周聖人之德精粗小大無所不備
其始卒相成蓋如此此金聲而玉振之所以譬夫孔子
之集大成而非三子之所得與也然即其全而論其偏
則纖而不能洪清而不能濁者是其金聲之不備也不

能備乎金聲而遽以玉振之雖其所以振之者未嘗有異然其所振一全一闕則其玉之為聲亦有所不能同

矣

文公文集

樂器八音因草按諸志匏瓠也女媧氏列管於匏上納簧其中爾雅謂之巢大者曰竽小者曰和今以木漆代匏竹管也三孔曰簫淳古以葦為之簫舜所造爾雅謂之箛長尺四寸漢世有洞簫又有管長尺圍寸笛漢武帝工人丘仲所造元出於羗中長尺有咫篪吹孔有觜

如棗邊荒出於邊吹觱篥本名悲栗其聲悲出於塞外
木祝敔也祝以舉樂敔以止樂今貫為指板絲琴也伏
義所造舜五絃武王加之為七絃柳渾造一絃琴十二
柱如琵琶形擊之以竹曰擊琴新唐志云琴工猶傳楚
漢舊聲蔡邕五弄楚調四弄瑟太昊所造箏本秦聲或
言蒙恬所造非也如琴而絃少京房造五者准十三絃
乃箏也筑如箏細項以竹擊之如擊琴琵琶四絃漢樂
也秦長城之役有絃鼗而鼓之者漢武帝以宗女嫁烏

孫以為馬上樂今俗謂之秦子阮咸亦秦琵琶也唐武
后時蜀人得之古冢晉竹林七賢圖阮咸所彈與此同
因謂之阮咸箜篌漢武帝樂人侯調所作豎箜篌羌樂
也體曲而長二十二絃豎抱于懷兩手齊奏俗謂之擘
箜篌又有鳳首箜篌唐善子所作如軫七絃土塤也帝
堯埏土為之形如鵞卵六孔銳上豐下新唐志云土則
附草而為鞞缶形如覆盆古西戎之樂以四杖擊之金
鍾也黃帝工垂所造大曰鐃爾雅謂之鐃小而編之曰

編鍾中曰甗小曰甗鐸于圜如碓頭鐸木舌搖之以和
鼓石磬也泗濱浮磬是也梁有銅磬蓋今方響之類方
響以鐵為之長九寸廣二寸負上方下架如磬而不設
業倚於架上以代鍾磬人間所用者才三四寸耳銅鈸
出於西戎其圖隱若浮漚貫以韋皮相擊以和樂銅鼓
虛其一面覆而擊之扶南天竹類皆如此草鼓也雷鼓
路鼓靈鼓以多寡之數言之也夏后氏加之以足謂之
足鼓殷人貫之以柱謂之楹鼓周人縣之謂之縣鼓後

世從殷制謂之建鼓晉鼓應鼓與金奏相參小鼓有柄
曰鞀大曰鼗搖之以和鼓腰鼓大者瓦小者木皆廣首
而纖腹本羌鼓齊鼓大如漆桶檐鼓小如甕羯鼓正如
漆桶兩手俱擊以其出羯中故曰羯鼓亦謂之兩杖鼓
都曇鼓小於羯鼓擊之以槌毛負鼓雞婁鼓皆腰鼓也
樂縣周禮天子宫縣諸侯軒縣大夫曲縣士特縣縣之
橫曰筦立曰簾飾筦以飛龍飾簾以飛廉鍾簾以摯獸
磬簾以鷖鳥上列樹羽傍垂流蘇周制也縣以崇牙殷

制也飾以博山承以花跗覆以華蓋上集翔鷺後世之所加也漢魏晉宋齊梁六朝宮縣凡二十架鐃鍾十二編鍾四磬四也隋增為三十六簾唐初因之又設熊羆鼓吹按十二高宗時蓬萊樂縣充庭凡七十二架夫郊廟百神之祀會朝宴享之禮各有罷數隋唐尚侈大畧如此惟宋朝樂縣未嘗過三十六簾將相大臣之家歌兒舞伎容或有之而樂之罷數不聞凌僭至今大家猶然亦足見為國以禮可與天地相為長久也

樂有八音之節樂有五聲十二律更唱迭和以為歌舞
八音之節其所以蕩滌邪穢消融渣滓者人若無所用
其力也故學者之終必深有得於此然後成焉蓋其義
精仁熟而自和順於道德也

文公
語注

聲相聯如貫珠五音六律不具不足為樂五音合矣清
濁高下如五味之相濟而後和合而和矣欲其無相奪
倫然亦豈宮自宮而商自商乎不相反而相連如貫珠

可也

文公
語注

樂未作擊鐃鍾鐃甚大特懸鍾也衆樂未作先擊此

鍾以發其聲衆樂既闋乃擊特懸磬以收其韻

文公語注

六十聲如甲子又曰樂之六十聲如六十甲子凡十二

律每律管五聲如黃鍾自管五聲大呂太簇夾鍾以下

每律皆管五聲甲子支干亦然甲子管丙子戊子庚子

壬子乙丑管丁丑己丑辛丑癸丑以下皆然便是樂一

般以十干合十二支而成六十甲子以五聲合十二律

而成六十聲若不相屬而寔相為用也但術家有納音

之說不可曉前輩多論此皆定說遺書云三命是律五
星是厯即此說也

公文公

論作樂體雷聲地中先有雷然後能出而發其有中元
無樂如何作樂天雷本發於地則奮然而震驚此亦順
動之象也故先王體此作樂夫樂者亦本諸人心發而
寓諸金石鍾鼓之間今人須看雷之所自發處及樂之
所自起處則豫之義可知不然則徒見震驚之聲則謂
之雷論清濁調其宮角則謂之樂此不足與語雷聲之

義也上天下澤履此易之言禮雷出地奮豫此易之言
樂大凡天下事不知其理不可便言其無有如柳子厚
言樂不能殖財只為自不見此道理

成公文集

樂者蓋本乎政樂者本乎政也政善民安則天下之心
和故聖人作樂以宣暢其和心達于天地天地之氣感
而大和焉天地和則萬物順故神祇格鳥獸馴

周子通書

羣書考索續集卷二十七

欽定四庫全書

羣書考索續集卷二十八

宋 章如愚 編

封建門

封建

辨蘇子由古史論封建之不可復始皇紀論封建之不
可復其說雖詳而大要直謂無故國之可因而已嘗試
考之商周之初大賚所富已皆善人而其土地廣狹隨

時合度無尾大外強之患王者世世修德以臨之又皆
長久安寧而無倉卒傾搖之變是以諸侯之封皆得傳
世長久而不可動非以有故國之助而然也秦至無道
決無久存之理正使采公卿之議用淳于越之說並建
子弟以自藩屏不過為陳吳劉項魚肉之資雖有故國
之助亦豈能以自安也哉至若漢晉之事則或以地廣
兵強而逆節萌起或以主昏政亂而骨肉相殘又非以
無故國之助而亡也蘇子之考之也其已不詳矣至於

又謂後世之封建者舉無根之人寄之吏民之上君民不親一有變故則將漂卷而去亦與秦之郡縣何異若使秦能寬刑薄賦與民休息而以郡縣治之雖與三代比隆可也夫以君民不親而有漂卷之患為不異於郡縣是固以封建為賢於郡縣但後世之封建不能如古之封建故其利害無以異於郡縣耳而又必曰以郡縣善而治之猶可以比隆於三代至於封建則固以為不可豈封建則不可以善治而必為郡縣乃可以善治耶

若以無根為慮則吾又有以折之夫天生烝民有物有則君臣之義根於情性之自然非人之所能為也故謂之君則必知撫其民謂之民則必知戴其君如夫婦之相合朋友之相求既已聯而比之則其位置名號自足以相感而相持不慮其不親也如太公之於齊伯禽之於魯豈其有根而康叔之於衛又合其再世之深仇而君之然皆傳世數十衛乃後周數十年而始亡豈必有根而後能久耶至於項羽初起即戰河北其為魯公未

必嘗得一日臨蒞其民也而其亡也魯人猶且為之城
守不下至聞其死然後乃降以至彭越之於梁張敖之
於趙其為君也亦暫耳而樂布貫高之徒爭為之死以
至漢魏之後則已為郡縣久矣而牧守有難為之掾屬
者猶以其死捍之是豈有根而然哉君臣之義固如此
也若秦之時六國強大誠不可以為治既幸有以一之
矣則宜繼續其宗祀而分裂其土壤以封子弟功臣使
之維持參錯於其間以義言之既得存亡繼絕之美以

勢言之就使有如蘇子之所病則夫故國之助根本之固者又可於此一舉而兩得之亦何為而不可哉但秦至無道封建固不能待其久而相安而為郡縣亦不旋踵而敗亡蓋其利害得失之筭初不繫乎此耳蘇子乃以其淺狹之心徇習之見率然而立論固未嘗察夫天理民彝本有之常性而於古今之變利害之實人所共知而易見者亦復乖戾如此是則不唯其窮理之學未造本原抑其莫年精力亦有所不逮而然也或曰然則

為今之計必封建而後可以為治耶而度其勢亦可必
行而無弊耶曰不必封建而後可為治也但論治體則
必如是然後能公天下以為心而達君臣之義於天下
使其恩意足以相及情意足以相通且使有國家者各
自愛惜其土地人民謹守其祖先之業以為遺其子孫
之計而凡為宗廟社稷之奉什伍閭井之規法制數度
之守亦皆得以久遠相承而不至如今日之朝成而莫
毀也若猶病其或自恣而廢法或強大而難制則雜建

於郡縣之間又使方伯連帥分而統之察其敬上而恤下與其違禮而越法者以行慶讓之典則曷為而有弊

耶

文公
文集

封建則無夷狄亂華之患制井田所以制國也所以制王畿也王畿安強萬國親附所以保衛中國禁衛四夷也先王建萬國親諸侯高城深池徧天下四夷雖虎狼貪安得肆其貪而逞其志乎此三王為萬世慮禦四夷之上策也王公設險以守其國孔子所以書於習坎

之彖也城郭溝池以為固孔子所以答言偃之問也自秦而降郡國天下中原而世有戎夷之禍悲夫

五峯胡氏

罷封建而郡縣最是柳宗元曰封建非聖人意也勢也不得已也私其力於已也秦之所以革之者其為制之大者也公天下之端自秦始東坡取其說而附益之曰聖人不能為時亦不能失時時非聖人所能為也能不失時而已三代之興諸侯無罪不可削奪因而君之雖欲罷侯置守有不可得者此所謂不能為時者也周衰

諸侯相併兵力相殘久矣世之畏諸侯之禍非獨李斯
秦皇知之始皇既定天下分都邑置守令理固宜然冬
裘夏葛時之所宜非人之私意獨見也所謂不失時者
云○凡有血氣者必爭爭之必以利利莫大於封建封
建者爭之首亂之端也自書契以來君臣父子兄弟之
相戕有不出於襲封而爭位者乎近世無復封建而此
禍幾絕而仁人君子忍復開之歟

封建乃天道之公郡縣乃一人之私封建與天下共其

利天道之公也郡縣之制以天下奉一人人欲之私也
封建者帝王所以順天理承天心公天下之大端大本
也郡縣也者伯世暴王之所以縱人欲悖天理私一身
之大孽大賊也分天下有德有功者以地而不終以天
下自私於是有百里有七十里五十里不能五十里邦
國之制焉於是有君朝卿大聘大夫小聘王巡守侯述
職之禮樂法度焉於是有千雉百雉三之一五之一高
城深池焉於是有井邑丘甸縣鄙之夫數焉於是有十

乘百乘千乘萬乘之車數焉於是有伍兩卒旅師軍之制焉於是有卿大夫司徒樂正取士之法焉邦國之制廢而郡縣之制作而世襲之制亡矣世襲之制亡而數易之弊生矣數易之弊生而民無定志矣巡守述職之禮廢則上下之情不通攷文案而不究事實信文案而不任仁賢之弊有不可勝言者矣城池之制廢而禁禦暴侮威服四夷之法亡矣夫家之法廢則民數不可詳矣民數不可詳而車乘不可出矣車乘不可出而軍師

不隱於農矣軍師不隱於農坐食者衆而公私困窮矣
世儒不知王政之本反以亡秦為可法所以歷千五百
餘歲未有能復之者也

胡寅論

不必封建柳宗元有曰封建非聖人意也蓋自上古以
來有之聖人不得而廢也故制其爵位之等為之禮命
之數合之以朝覲會同統之以長師牧伯而後可治也
周室既衰併為十二列為六七而封建之禮已亡秦以
詐力一天下剗滅萬國以為郡縣三代之制不可復矣

後世惟知周之長久而不知所以長久者由其德不獨
於封建也必欲法上古而封之弱則不足以藩屏強則
必至於僭亂此後世封國之弊也且堯舜有天下猶不
能私其子不以一人而害天下也況諸侯之後嗣或賢
或不肖而必使繼世乎是以一人之害一國也然則如
之何記曰禮時為大順次之堯舜禪受湯武征伐三王
封國後世郡縣時也先王之禮或損或益因時制宜以
便其民順也古之法不可用於今猶今之法不可用於

古也後世如有王者親親而尊賢務德而愛民謹擇守
令以治郡縣亦足以致太平而興禮樂矣何必如古封
建乃為盛哉

范祖禹

分封之策文帝已行賈誼分封之策文帝固已行弟世
俗不深攷爾分趙之河間以王辟疆分齊為七國以王
齊後豈非衆建諸侯而少其力乎誼之策帝固已先得
之其聞誼之言所以無嘉納之詔者蓋此機不可洩於
外也嗚呼文帝分諸侯之權非惟諸侯不知羣臣皆不

知之至景帝武帝之時亦不知之至於數百年猶不知
之所謂善行者無轍迹乎故表而出之以見帝之不可

及

西漢年
表節要

異姓諸侯王表

云

故據漢受命譜十八王月而列之天

下一統乃以年數訖于孝文異姓盡矣

諸侯王表昔周監于二代三聖制法立爵五等封國八

百同姓五十有餘周公康叔封於魯衛各數百里太公

於齊亦五侯九伯之地

五等諸侯
九州之伯

所以親親賢賢褒表

功德關諸盛衰深根固本為不可拔者也

云云自號為皇

帝而子弟為匹夫

云云

故曰周過其歷秦不及期國勢然

也漢興之初海內新定同姓寡少懲戒亡秦孤立之敗

於是剖裂疆土二等之爵功臣侯者百有餘邑尊王子

弟大啟九國

燕代齊趙梁楚荆
吳淮南長沙云云

可謂矯枉過其正矣

云云

故文帝采賈生之議分齊趙景帝用晁錯之計削吳楚

武帝施主父偃之冊下推恩之令使諸侯王得分戶邑

以封子弟不行黜陟而藩國自析至哀平之際親屬踈

遠是故王莽知漢單微亡所忌憚是以究其終始強弱之變明監戒焉

王子侯表孝武以諸侯王疆土過制制詔御史諸侯王或欲推私恩分子弟邑者令各條上自是支庶畢侯矣高惠高后文功臣表漢興訖十二年侯者百四十有三入時大城名都民人散亡戶口可得而數是以大侯不過萬家小者五六百戶封爵之誓曰使黃河如帶泰山若礪國以永存爰及苗裔申以丹書之信重以白馬之

盟又作十八侯之位次

蕭何曹參張敖周勃樊噲酈商
奚涓夏侯嬰灌嬰傅完靳歙王

陵陳武王正薛歐
周昌丁復蘇達

高后詔陳平盡差列侯之功藏諸宗

廟副在有司始未嘗不欲固根本也建文景四五世間
多陷法禁訖于孝武後元之年靡有子遺耗矣網亦少
密焉迹漢功臣亦皆剖符世爵受山河之誓綴讀前記
盡于孝文以昭元功之侯籍

景武昭宣元成功臣表春秋列路子之爵許其慕諸夏
也漢興至于孝文時乃有弓高襄城之封

師古曰皆從
匈奴來降而

得封雖自外徠本功臣後至孝景始欲侯降者周亞夫守約而力爭帝黜其議初開封賞之科又有吳楚之事武興胡越之伐將帥受爵應本約矣

秦漢之際月表班固謂三代承聖王之烈漢收孤秦之弊是一說此亦是封建利害 又是道德之威狂妄之

威成乎安強滅之之說

唐仲友云

諸侯王表班固意主封建觀周秦利害以明漢初大封宗室利大害小後弱宗主利小害大當初只合少其力

不當奪其權

王子侯表班固二序有深意皆得顯微之體武帝托廣親分諸侯元帝時宗室衰兆見物莫兩大

高惠高后文功臣表班固分作此一節有深意緣景帝之後方有非有功而侯者此序大意傷漢於功臣恩澤薄高文不輕予人爵孝武固密使靡有子遺

景武昭宣元成功臣表班固序意不取景帝降侯者上又有深意吳楚秦越用兵雖應本約不比創業非得已

易師開國承家小人勿用

周崇德報功建官推賢位事惟能漢事與周別大抵起於

征夫

外戚恩澤侯表只論亡名便見僥倖若論高祖繼絕皆為民心無恩澤後世以寵宰相外戚為僥倖故司士以德詔爵以功詔祿以能詔事以久奠食惟賜無常惟予以馭其幸

封侯漢設爵二等曰王曰侯皇子而封為王者實古諸侯也故謂之諸侯王王子而封侯者故謂之諸侯羣臣

異姓以功封者謂之徹侯大者不過萬家小者五六百戶以為差降古者有分土無分民自漢始分民而諸侯王國皆連城數十踰於古制不特此也有以宦官而封侯者高后八年封中謁者張釋卿為列侯是也有見任宰相而封侯者公孫弘封平津侯是也有以婦人而封侯者蕭何夫人開封鄼侯樊噲妻呂須封臨光侯是也有以方士而封侯者欒布封為樂通侯是也或以地名如以蘇建為平陵侯衛抗為宜春侯或以功號如霍去

病比再冠軍封為冠軍侯趙破奴從驃騎將軍封為從驃侯或以美名張騫封為博望侯取其廣博瞻望霍光為博陸侯取其博大陸平若是者皆無定制非復先王列爵分土之意也

周漢封建之意先王之封建選建明德茂啟崇勲蓋以為疆理天下畿方千里以為甸服內官不過九御外官不過九品舉天下之大而毋敢專享其功亦惟我一二兄弟甥舅是攝是贊同獎王室毋相害也苟於建置之

始雜焉無所別白於其間則吾之所與共守天下者何
以為長久之道哉是故大功莫如齊則身兼五侯之地
明德莫如魯則國侈百里之封曹文之昭而為伯甸德
薄者不以居尊位也晉武之穆而列侯藩功大者不以
殿小邦也以至武王之母弟八人而五叔無官蓋文武
周公封建之初心為褒表功德而設非徒曰大封同姓
以明親親而已漢高帝懲秦人孤立之弊而不知有周
家褒表之法以里閭之恩裂全燕之地封故人以閨門

之私分天下之半而王孽子信何功而王於韓裨何德而王於吳是故周雖東遷而卒收五伯之功漢末中世以激七國之變魯衛晉宋尚能城成周於王室如綫之時彭韓英盧遽欲連帝釁於帝業甫成之日周家封建之效如彼漢室封建之患如此安得不歸於始者褒表之當否耶雖然漢固失之矣然有可諉者曰周德下衰始曲沃以一軍而封褒表之意已失矣又其甚也韓趙魏以三家而侯封建之制蕩然矣漢自文景以來有賈

誼以啟衆建之失有主父以明推恩之令亦足以少弱
其強大之勢矣嗚呼封建之法得之於文武周公而子
孫廢之失之於高帝而子孫復之漢亦無大戾於周矣

羣書考索續集卷二十八

欽定四庫全書

羣書考索續集卷二十九

宋 章如愚 編

官制門

歷代官制

總序三代之道人非天地不生天地非人不成故凡君臣庶民皆人也人不能以自治故必推其能順天地以治人者戴之而謂之君君不能以獨治故必擇其能代

天工以共治者任之而謂之臣君臣之間兩盡其職則民得其所矣古今天下有是民則有是相生養之事有是事則必有是相維持之職非古無而今獨有之也惟職當於事則知所以為民職浮於事則徒知所以自為而已少皞以五氏司民時五鳩鳩民事五工正以利民九農正以扈民皆為民也堯命羲和以授民時舜命九官十二牧以主民事夏商官倍亦克用乂周家設官以為民極皆順天地代天工者也以一君而統百官而理

萬民所謂本也以萬民而養百官以百官而奉一君所謂本立而末自舉也今昔建官上必量材而授下亦自量而受則知所本矣不知所本而君臣重於自奉輕於為民是豈天地之心哉故夫無是事而立是職無是實而有是名者皆非也官苟可以理民則與其煩也寧簡職苟可以集事則與其草也寧因必攷已事之驗不為鑿空之談則古今官制名實之是非煩簡因革之當否其如指諸掌矣

職官表志太上龍雲鳥火之號至春秋時郊子猶能識之則知文籍既生官制未嘗無表志焉書稱唐虞稽古建官惟百夏商因唐虞而倍其數第第相承必有品式若表志然所患文獻不足以證之耳周典一書此又表志之大者非周公創為之也乃損益帝王之制而備之耳曰百官倍曰三百六十此其制也曰萬國咸寧曰亦克用又曰以為民極此其意也班固漢表必先叙其所因以明簡易次述其增並由武帝之侈心終言新式慕

古無補而吏民不安以見光武中興節約之意有足法者范曄志東漢百姓止存光武之制而其後之所因革損益漫不及焉晉隋唐志但紀官名之變復而煩簡是非之實又無所旌別非惟後世官制不如漢初之簡易而史之志百官也亦失班氏紀述之體矣是安能究古者建官之本意哉

歷代官制因革周典六官其來尚矣唐虞水土事殷故伯禹以司空居家宰之任垂益以工虞分司空之職是

時兵刑雖設民用不犯於是司馬司寇臯陶兼掌之而有餘禮樂教化務所當先於是司徒宗伯契夷夔分典而不足棄后稷龍納言十有二牧食哉惟時凡以為民也三代相承率由斯道秦人不師古始輕變官制未害也特罷侯置守尊君抑臣燔燒詩書以愚黔首其意唯知自奉而不知有臣民也雖然周之官制非至秦而始變也蘇秦為國相許歷為國尉孫龐仕魏為將軍而須賈亦為魏中大夫吳起守西河馮亭守上黨西門豹令

鄴荀卿令蘭陵是則守令將相之名在戰國則已然特至秦而始定耳夫是制既定於秦而漢人復因秦舊自魏晉迄于隋唐又復因先漢之名而升降之如秦漢侍衛之士謂之侍郎而近世居從索之尊秦漢出入禁闥謂之侍中而近世為三省之長秦漢僕射之職甚卑而近世以為宰相之任其升降輕重雖不同第顧其所任之人與夫所以為民之意如何耳其或煩其制以病民侈其名以尊已文貌有餘而精神不足氣血壅滯而脉

賂不貫者皆未免秦皇漢武之餘習也

歷代官名沿襲人皆謂唐之官名因乎隋宋朝官名因乎唐魯不知公師保傅大尉將軍自周漢已有之二漢百官表志有侍中備顧問有僕射中常侍黃門侍郎給事中等皆在禁中似今門下省也有尚書令又曰中書謁者令掌選置及奏下文書衆似今中書尚書省也有尚書僕射佐令奏下衆事似今左右僕射也有尚書六人分為六曹典天下集課事似今六部尚書也

內有三公尚書

二人典三公文書有吏曹尚書典選舉似今吏部尚書
也有常侍曹尚書掌公卿事有二十石曹尚書主郡國
二千石及水火盜賊似今刑部兵部尚書也有民曹尚
書典治功作及監池苑園似今工部戶部尚書也有客
曹尚書似今禮部尚書也又有左右丞掌錄文書似今尚書左右丞

也每曹有侍郎六人似今六部侍郎也有尚書郎有尚
書郎中似今六部郎中員外郎也不特此也少府之屬
有御史大夫有御史中丞有治書御史有監察御史東
宮之屬有庶子有詹事有舍人洗馬議郎九卿則有宗
正司農太常光祿太僕衛尉鴻臚大理七監則有都水

將作大匠等其餘如太史太祝太醫博士祭酒光祿大夫大中大夫諫議大夫凡此之類皆二漢之官名也唐豈特因隋宋朝豈特因唐也哉夫古今天下雖封建與郡縣不同而其民其事則同故其所以異者封建則事要而官簡郡縣則事煩而官冗也周之官簡矣復以三公兼冢宰以三孤列九卿則其制為益簡民胡得而不安秦漢以來官冗矣既有三公復有三師既有三省復有六曹既有九寺復有七監則其制為益冗民胡得而

不病哉

隋志云隋尚書八座六部之屬並如漢制又如梁武用宋齊舊制有尚書省置令僕六尚書有

門下省置侍中給事侍郎有中書省置監令侍郎又有集書秘書省此見隋唐官名皆因秦漢魏晉六朝之舊也

歷代改制不如省官孔子欲正名於衛者正其父子君臣之名分也夫豈徒名之謂哉是故太古官名雲師火紀不必相同而況於唐虞三代乎欲正其名亦必考論其實而已秦更周制王莽更漢制煬帝更隋制皆未幾而亡武后玄宗更唐制蔡確蔡京更宋制皆未幾而亂

漢光武宋高宗不更舊制惟務省官皆身置中興之功
目擊太平之效者何也蓋君與臣為一心臣與民為一
體設官分職凡以為民也徒更其名與制而不計其民
之便與否是分擾臣民之體統而使之氣脉不相通貫
綱目不相聯附所以亂亡相尋也惟能省官而從節約
之制則猶夫清心而四體安提綱而萬目張茲其所以
為治歟

後漢志云漢興畧依秦制武帝改作民用匱乏
世祖并官省職費減億計四海風從中國安樂

宋高宗孝宗併光祿鴻臚歸禮部并衛尉入兵部太僕
入駕部又以少府入將作太府入殿中內侍監入內侍

省大而三省亦不置長官惟
改僕射之名為丞相而已

歷代正名不如務實新室後周皆因倣周官之制而更
立公卿大夫元士之號其大畧則同莽以采地制祿視
歲之豐凶而增損宇文以穀制祿視年之中上下而頒
餼之其制亦畧同顧其所以異者莽之制度煩碎吏終
不得祿而各自為奸以取給周提其綱而秩祿有定賦
加之以六條清心無非便民之事此其所以治也然則
漢制不因周而因秦唐制不因後周而因隋亦足以致

治者何歟漢之初興凡事簡易唐之初興亦務省官其制不必慕古而其意則微有合於古也使武帝能循高祖之法玄宗能遵太宗之制雖不紛更不害其為治也宋初務實與漢唐之初同元豐改制政和正名與建元開元同得失之迹可以鑒矣

漢官制

官制有爵有職官又有加官漢官制有爵有職官又有加官自公士至徹侯凡二十級者爵也三公九卿者職

官也侍中左右曹諸吏散騎中常侍之屬加官也其爵則以功次差轉等級有差攷之樊噲夏侯嬰二傳可見其職官之除授初不係其爵之高下固有爵崇而官不轉者樊噲爵至列侯始遷為郎中夏侯嬰至侯不離乎太僕是也亦有官尊而未有高爵者景帝後元年賜中二千石諸侯相爵右庶長是也遷轉之制或遲或速雖有資格未始一拘於資格也唯加官所加則出於上之特恩其所加則上自列侯將軍而下至郎中皆可以出

入禁閤故其叙官多在職官封爵之上漢初未有加官且自武帝始置此而外廷公卿之權蓋於是乎輕矣

加官之制自奉車都尉之外凡七

侍中 左曹 右曹 諸吏 中常侍

散騎給事中

奉車都尉掌御乘輿親近之職也故加官皆屬

焉以此見加官皆親近也侍中中常侍得入禁中諸曹得受尚書事

左右曹也受者受而奏御也

諸吏得舉法散騎得騎馬

並乘輿

言騎而散從無常職也

又有給事中中常侍從左右備顧問

問應對所加或大夫或博士或議郎掌顧問應對位次

中常侍又有給事黃門位從將軍大夫○置加官乃是
疎外宰相諸吏舉法乃是奪御史中丞之權

鄭節卿

光武省官非濟已私光武中興深察前弊且當天下彫
耗思樂息肩之時躬行節儉取西都官制隨事裁損大
畧求以濟天下實用而非為已私也故以太常言之太
卜則省併太史中興所省凡十官以光祿勳言之車戶
騎三將及羽林令皆省焉以衛尉言之則旅賁令衛士
一人丞皆在所省也太僕之六廐則置一廐牧師苑皆

令官也亦從而省焉右監廷尉之屬也驛官別火之令
丞鴻臚之屬都司空者宗正之屬也均輸司農之屬也
中興悉從而省焉水衡離宮燕居之處則省併於少府
將作大匠之所存者左右校二令而已此軍中候監五
營中興既省中壘胡騎之併於長水虎賁又併於射聲
世祖節約之制所以反前日浮冗之弊而天下之官師
相與維持一代之治者宜為武帝之常憲武帝奢廣之
事所以濟一己之私者固有間矣

純摹

政權必有所寄蓋政權不可一日不在朝廷不在朝廷則在臺閣不在臺閣則在宮闈在朝廷則治在臺閣則亂在宮闈則亡西漢興敗舉出於此漢自孝惠垂拱責成輔相人主皆不曾自有所為至晁錯以五帝親事之說告文帝而文帝不用輔相大臣權望日重以武帝初年田蚡以帝舅之尊始招徠賓客薦進人物當時固有起家二千石之事然而政在朝廷畢竟是宰相陰用人才亦奚不可者使武帝以蚡為非其人則權擇一相委

任責成豈惟漢家將後世終無權柄下移之禍奈何帝不能堪欲攬威福之柄然一已聰明有所不逮必須置人為耳目故置加官及尚書之屬自此以後薦進人物盡在左右侍從之人衛青幸則薦主父偃嚴助幸則薦朱買臣楊得意幸則薦司馬相如起家亦自驟貴與其假借左右孰若與宰相同之也夫捨大臣而與小臣謀固不是然此等由是朝士及後以中朝與外朝有黨而尚書等不甚周密於是別用一項人如中書宦者之屬

及元成以後向之所謂侍中尚書皆不如中書宦者用
事揚雄傳所謂丁傅董賢用事諸附離之者或起家至
二千石與其委之閹豎又不若任之臺閣近臣

比石中石試官守官漢之官制最有好處均之為二千
石也而有比者有真者有中者均之為官吏也而有試
者有行者又有守者比不如真真不如中試不如行行
不如守觀霍光傳有行大鴻臚事少府樂成是樂成守
少府而兼行鴻臚事爾按九卿鴻臚位第二而少府位

第五以少府而兼行鴻臚事未得為真也亦猶平陽侯
窟行御史大夫事韓安國張湯行丞相事蓋寬饒為諫
大夫行郎中戶將事翟義為都尉行太守事爾凡此皆
兼行之也宣帝元康元年守京兆尹潁川太守黃霸五
鳳元年守左馮翊凡此者皆是擢守此守舊銜而帶之
爾非兼行之也至於試則不及此矣王溫舒試縣亭長
張禹為郡文學試為博士以此見試不如行行不如守
又王尊為號令轉守槐令兼行美陽令事是王尊雖兼

三令只在號為令蓋守者為遷擢兼行者為權攝又王
尊為諫大夫守京輔都尉行京兆尹事旬月間盜賊清
遷光祿大夫守京兆尹後又為真如此則前日京兆只
權行今日有功則擢守既守乃為真諸守臣稱職者滿
一歲則為真又有身帶兩官一官具職秩位號者張安
世為右將軍光祿勳趙充國自水門都尉擢後將軍領
水衡如故凡此將軍皆號爾非有職事官屬也金安上
光祿大夫中郎將馮奉世光祿大夫水衡都尉凡此士

夫皆加秩爾亦非有他官守也正如宋朝官制未行之
前凡尚書翰林皆是遷轉之階爾凡官缺攝者稱行官
卑職重者稱守兼它官者稱權出者稱奉使國家之制
朝官資歷淺者間出補外不過下一等帶一權字耳所
謂權發遣者惟三司開封官爾其後王金陵引用新進
監司郡守始皆帶權發遣矣甚至於擢知縣資格而為
之

漢唐樂美名漢武帝上嘉唐虞下樂商周制度動欲慕

古而叛置官名獨不能法古者侈心奪之也唐太宗使
長孫無忌輩撰集隋志觀其叙歷代官制自秦而下至
于隋大畧相仍損益無幾獨謂後周酌豐鎬之遺文其
典制有可觀焉又謂隋煬號令日改官名月尋而南征
不復朝廷播遷則是衰周而貶隋也今觀有唐官制又
復捨周而循漢魏陳隋之舊者何哉亦以公孤侯伯之
稱近於樸古而省部寺監之號足為美觀也厥後易尚
書省為文昌臺門下省為鸞臺中書省為鳳閣祕書省

為文臺之類豈非樂其名之美歟梁武帝增十二卿以象四時草選部定為十八班作戎秩百有餘號皆其類也其於治忽本無所係焉唐太宗猶有異於漢武帝者尚能省官故也

唐官制

太宗省官固善不合有員外之置有事則有職有職則有官理也古人以事任人事省則職省故有二職而無官後世以人任官人增則官增故有二官而無職有職

而無官非廢事也或一官而兼數職有官而無職非增
事也或一職而任數人周官三百六十總而計之為六
萬三千六百有奇非皆具貲也攷之周禮名存而實不
備職具而官不除者蓋多也今貞觀省內外官六百四
十貞唐志七百貲太宗曰吾以此待天下賢才足矣非
不甚美然貲外置已見於當時將何以一流品杜將來
哉其後又有特置同正貲檢校兼守判知之類皆非本
制宰相或至數人平章事或與外任一官而數人守之

負外官至二千餘人其末流之弊未必非太宗啟之

朱輔

云

開元六典象周為制魏鄭公嘗以周典為太宗獻太宗以為不井田不封建不肉刑而欲行周公之道不可得帝也既懷畫虎不成之疑徵等復慙禮樂廢缺之問是六典者而太宗且未之能行而唐初官制自因漢魏之舊本不與周典相侔開元十年玄宗手寫六條曰理典教典禮典政典刑典事典命張說陸堅修撰經歲無成

乃命毋熹韋述輩參撰始以唐之百官令式象周禮六
官為制蕭嵩張九齡李林甫相繼知院至開元二十六
年乃成是知唐制與周官本不相侔六典特象周為制
耳如其制同則修書朝夕可就也何必更易數十人綿
延十六年哉况唐自高宗迄于肅宗官名屢有因革高宗
龍朔盡改舊名咸亨元年復武后先宅垂拱天授又改
中宗神龍復玄宗開元二年改五年復天寶又改肅宗
至德而玄宗一人之身三變官名元年改僕射為丞相
復中書為紫微門下為黃門侍中為監至五年而復舊二

十四年改主爵為司封天寶元年盡改三省之名而以吏部為文部兵部為武部刑部為憲部之類先後自為異全也如此其制安得與周之六官同其所以同者不過曰尚書以正邦理以宣邦教門下以和萬邦以弼庶務中書以釐萬邦以庶百揆之文而已吁六典象周為制既非其實元豐又復象唐以正名曷若各循祖宗之法哉

宋朝官制

宋初務實意尚書二十四司由漢以來未之有改也宋太祖太宗一旦懲五季藩鎮外重之弊凡尚書郎曹卿寺等官悉領外寄以分其勢於是上而三省六曹下而九寺七監皆為寓祿官而臺省寺監悉以他官兼領名若未正而實則有餘者非其人不以任是職也自章聖咸平中楊億首言文昌會府宜復其舊是時李公沆實任端揆而未嘗有所更變仁祖至和中吳育亦言尚書天下之大有司當漸復之是時文潞公富鄭公皆在中

書亦不聞有所改作誠知祖宗立法自有深意也自熙

寧中王安石用事而元豐初王珪蔡確繼之悉取百年

成法

自宋初至元豐三年正得百二十年

更而張之於是六尚書二十四

司與夫九寺五監皆復其舊一時之名亦甚正矣柰何

其名既詳而其實則不可遍察也當是時以左右僕射

而兼中書門下之職者珪與確也相臣如是他可知矣

是時章子厚除門下侍郎蒲宗孟除尚書丞安燾為戶部尚書曾孝寬為吏部尚書遂使奸邪朋

附充塞朝路元祐諸賢雖出力以障其瀾而紹聖政和

羣小

章子厚曾布蔡京

又從而撤其防矣然則務名務實其得

失相去乃爾相遠耶

官制舊典論曰宋朝沿唐制設官假名以任職責之事功以實不以

文故以三省六曹寺監官僚之名分品定祿命充職任自太子洗馬而上號朝臣自著作佐郎以下號京官在內為主判出外名奉使其領在京職任則不分京朝官若陞擢為臺諫經筵必備顧問朝臣領外差遣則是帶省曹寺監官僚之名奉使而出上至牧守監司下至倅宰管庫通以奉使目之推進擢新進之士官未升朝者即以太子中允處有出身人中舍處無出身人並任監司重其持節故也亦名借補計歲月以轉行故流品無雜名位知重矣

元豐改制因唐六典神祖晚年喜觀唐六典於是悉易

祖宗舊制而惟六典是法其大者建立三省以中書造命行無法式事門下審覆行有法式事尚書奉行而政柄悉歸中書又分班奏事各得其職所以分執政權而互相考察此改制正名之體統也奈何蔡確欲專中書之權遂白三省不建長官而以王珪為左僕射兼門下侍郎確為右僕射兼中書侍郎凡有除授珪不得預聞而確得以自專造命之權是審覆奉行之制已不行於當時矣呂公著進言三省當同班奏事分省治事司馬

公光遺奏亦謂有此事則置此官不必依唐之六典分
中書為三省蓋有見於確之自專也神祖是時已有悔
改官制之意珪確復以省費正名為言於是莫之能行
嗟夫小人託人主之公而行其私乘人主美意而逞其
不善之心大抵若此是豈變制改法之所能防閑哉惟
靜以察其所安而後可爾厥後翟思奏言以為今天下
之事其煩簡多寡蓋無異於未改制之前然昔以一官
治之者今析而為四五昔以一吏而主之者今增而為

六七故官愈多而吏愈衆祿愈廣而事愈煩每朝廷文
移下尚書省又付吏部又下寺監又下所領庫務自下
而達上者亦然故不若專責省部則官省而吏少事簡
而功速矣味思之言則知元豐改制適增冗官多事之

弊而已夫何名正之有

此翟思元祐三年奏也上距元豐五年才七年耳思又謂今有

禮部又有太常有膳部又有光祿勳戶部之有司農主
客之有鴻臚駕部之有太僕庫部之有衛尉工部之有
將作軍器水部之有都水監皆重疊置官例可
減省觀此言則元豐官制與熙寧新法何異

政和改宦官武臣之制宋朝盡釋節度兵權而寵以虛

名不置殿中監而止曰都知押班元豐正名於此獨無
所改作猶且知祖宗自有深意也政和中蔡京當國悉
加都知押班以大夫之名曰知省事曰同知省事曰簽
書省此按蔡龍圖舊典也止齋云京改都知為知省事
副同知為同知押班為簽書以效樞府事人易走馬承
受而為廉訪使凡節度觀察防禦團練並為正任非惟
名器濫褻而童貫得以專兵稔釁矣夫京之改武官制
也實壬辰歲也自是而至靖康丙午止十五年耳十五

年之間女真已有窺伺河洛之志併吞夷夏之心彼方習勒戎馬戰陣之事而此乃紛更武官虛名大抵皆取唐之武散官階與漢魏以來武官之名而雜就焉何異大盜隱伏門屏而家相方率歌童舞女雅修擊刺之容乎興衰治亂莫係於人事如此猥歸之天數不可得矣愚又嘗因是而推原改制變法之由而有感焉熙寧壬子王安石之新法行此一變也元豐壬戌蔡確之官制行此再變也元祐初年方復祖宗之舊而紹聖甲戌章

子厚重行熙豐之法此三變也崇觀宣政蔡京用事最久而紛亂法度非止一端此又其變之大者四變之餘靖康之禍作矣夫自熙寧壬子止於靖康丙午五十餘年之間而法度四變新法再行而終廢官制遂變而不復國有琴絲之擾民無一日之安禍胎於王安石呂惠卿長於蔡確章子厚成於蔡京王黼天下本無事庸人自擾之其斯之謂乎

新舊官制宋初廢官只存空名元豐新制以階易官唐

人之階二十九宋初之階十有五而元豐之階三十四而參錯二制而損益之也左右之制置於元祐紹聖罷之惟存其五而五者之名則定於大觀選人之制起於宋初崇寧七階已定其四而三者之名則更於政和此其建置之大凡也蓋國初懲藩鎮之弊朝官文臣出領外寄郎曹卿監皆為虛名特以是寓祿秩班位序而已而所典之事則別有職存也熙寧天子厲意更新制條例之司設檢正之官兵部軍器大理將作學官司農各

已修置董正治官之屬舉矣而名猶未正也乃元豐之三年取唐六典而與羣臣講明之踰二年而法成本末次第歷歷條舉或正而治之或旁而治之或統而治之其為治備矣然議者猶慮其無甄別流品也故元祐為之分左右焉而議者猶慮其沮人為善也故紹聖罷之而存其五焉所以存者謂卿監以上則不可不分之也若乃文林儒林登仕將仕在唐有之宋初已有之元豐正名至承務而止選人之四等七資未暇釐正此崇寧

所以必更其七而政和又定其四也歟雖然此特其制然也而其意之異同則有不可不論者且兩制以上不遷卿監舊法也而今也自朝請大夫直遷太中大夫此非有合於古歟少卿監以七十員為額舊法也而今也官至朝請大夫而止待朝議有闕則補此非有合於古歟合者固多矣而不合者亦不少也蓋祖宗舊制所以甄別流品者至為嚴密宰執侍從之遷為一等卿列館職之遷為一等進士為一等世賞雜流各為一等且進

士等遷司諫一人及第并制科遷祠部進士出身遷屯
田世賞遷虞部雜流遷水部夫司諫祠部屯田虞部今
之一朝奉郎也而甄別若此今有之乎六曹侍郎其遷
不等侍從臣寮自禮部遷戶部戶部遷吏部常調臣寮
自工部遷刑部刑部遷兵部夫六曹侍郎今之一正議
大夫也而甄別若此今有之乎舊制前行郎中進士則
遷太常少卿非進士則遷司農衛尉少卿由司農衛尉
少卿入光祿少卿今以一朝議該之是十二年之官一

遷即為之矣舊制六部尚書侍從則歷禮部戶部吏部
常調則自工而刑自刑而兵累而至吏部今以一銀青
光祿該之是十二年之官八年俱歷之矣昔之流品甄
別今之流品混淆昔之官品難於進今之官品易於高
流品有品則人安其分而無僥倖希覬之心官品不輕
則名器加重而天下知所趨向今則反是嗚呼安得如
丁鴈者而與之語祖宗之制哉安得如畢仲舒者而與
之論祖宗之制哉

省冗官言冗官之策於今日者將省其職乎抑省其員乎抑省其入仕之人乎元祐之減罷諸司建炎之罷併官屬此省其職也祥符之樞密直學士以六員為武治平之少卿監以七十員為額此省其員也開寶之罷流外慶厯之減任子此省其入仕之人也以翟思之奏攷之禮部有侍郎郎中員外祠部亦置郎中而太常又有少卿博士丞簿其實皆禮官也戶部之有司農主客之有鴻臚庫部有太僕衛尉工部水部有三監卒皆重復


置官翟思之言於哲宗如此至于今日又可知也又況祖宗時大縣置丞小縣不置今之縣不置丞者鮮矣大郡具僚屬小郡不具今之郡不具僚屬者鮮矣職之冗也如此其可不省乎以蘇子由之序攷之節度視皇祐八倍防禦視皇祐十倍大夫七倍景德朝奉郎六倍景德承議奉議郎三倍景德子由之言於哲宗也如此至于今日又可知也又況祖宗朝未始有添差也而今也有添差而再任者有添差而釐務者祖宗之時未嘗有

借補也而今也借補小使臣或至三五十萬員之冗也如此其可不省之乎嗟夫是固可省也而亦不易省也方今入仕之路廣得仕之員狹紆朱滿路襲紫成林率一官而三四人共之居者一人去者一人而伺之者又不止一人以今之職以今之員猶懼其無以處之也況又可省乎哉盍亦清其入仕之源乎上官均有言今之文職入流者凡四武職入流者凡三進士武舉得之也艱在所不論而四者之冗有可罷者有可裁抑者四者

之外又有攝官焉夫攝官之濫特止一方鬻爵之舉隨
創則隨罷在今日亦不必深講也如資蔭如特科如雜
流此皆蠹弊之根冗者其可不加之察乎建隆初禮部
稱齋郎裁十五人兵部補洗馬裁十二人至於慶厯則
有任學士二十年而出京官二十人者矣未離襁褓已
紆簪紱彼烏知國政民事為如何哉嘉祐推恩裁數十
人治平三百人熙寧之六年乃至四五百人日暮途遠
求田問舍之不暇何暇謀國家事哉有司胥吏主行文

書積勤累日例該祿仕至於三省人吏尤為優幸或以減年而出官或坐理資任而至郡守玩弄文法奸巧百端又豈能盡易昔之故態哉三冗未除百蠹隨至譬如決水於不流之澤前者未去後者方增不至於決堤決防不止不自其流而疏之浚之決之注之亦終於不可為也已○權行守試漢人守試之法滿歲稱職者為真不稱者歸本官亦良法也元豐之制高一品為行下一品為守下一品為試品同則否元祐以來行守試之外

又有所謂權者所以待資淺之人也夫階尊官卑者為行階卑官尊者為守官與階卑為行不守若是足矣而守之下有試焉試之下有權焉崇寧盡復元豐之法去權而用行守試至于中興而後元豐元祐之法並用矣



羣書考索續集卷二十九